



6. januar 2009

Inatsisartut Forretningsorden-iani § 36 imm. 1 tunngavigalugu Naalakkersuisunut apeqquteqaatit makkua apeqquteqaatiginiarpakka:

Suliffeqarfiit Namminersornerullutik Oqartussanik pigineqartut namminersortunngorsarnissaat pillugu Naalakkersuisunut apeqquteqaatit.

(Inatsisartunut ilaasortaq Palle Christiansen, Demokraatit)

Tunngavigisaq:

Aalisarnermut, Piniarnermut Nunalerinermullu Naalakkersuisoq, Finn Karlsen aammattaaq ATASSUT-mut siulittaasuvoq. Ukiortaami oqalugiaatiminut atatullugu ilaatigut imaattunik oqaaseqaateqarpoq:

”Kalaallit-nunaanni pisortat inuutissarsiornermik ataavartumik tapersersuinerata kiisalu tapiissuteqartarnerata nutaamik nalilersornissaa kiisalu naleqqussarneqarnissaa. Pisortat inuutissarsiornermut atatillugu inuutissarsiortunut namminersortunut unammillertannginissaat pingaaruteqarluinnarpoq. Maanna piffissanngorpoq pisortat suliffeqarfiutaat sorliit namminersortunngorsarnissamat piareersimanersut sukumiisumik siunniussaqaarfiusumillu piareersaaffigalugit suliaqarfigineqarnissaat pillugu misissuiffigineqarnissaannut”

Demokraatit tassaapput ullumikkut Kalaallit-nunaanni parti kisiartaalluni nutarterinissamat illersuisuusoq, taamaattumillu taamatut nalunaartoqarnera uvagut nuannaarutigaarput. Taamatut tusagaqarneq suli nuannernerulerpoq partiip Naalakkersuisooqataasup siulittaasuaniit oqaaserineqarmat, tassami tassangaaneermat naatsorsuutigisariaqarparput taamatut oqaaseqarnerup oqalunnerinnaannginissaa.

Tamakkua tunualiaqutaralugit Naalakkersuisut qinnuvigerusuppakka apeqquteqaatit makkua akissuteqaateqarfiqqullugit:

1. Pisortat suliffeqarfiutaat sorliit namminersortunngorsarnissamat piareersimanersut sukumiisumik piareersaaffigalugit suliaqarfigineqarnissaat qaqugu Naalakkersuisut suliaralugu aallartinnissaat naatsorsuutigaat?
2. Piareersaaffisalugit suliaqarnerit Inatsisartunut saqqummiunneqarnissaq qaqugu pissanersoq Naalakkersuisut naatsorsuutigaat?

Apeqquteqaatit ullut suliffiusut qulit qaangiutsinnagit akineqarnissaat kissaatigaakka.